



## **UN TIKI DI HISTORIA DI F.A.A.**

Después de su graduación riba tereno di neuropsicología na Universidad di Tilburg, Hulanda y a regresa Aruba na 1990 drs. Croes-Yáñez a experiencia cu tabatin masha poco información na disposición di e comunidad riba e tereno di Malesa di demencia tipo Alzheimer (MA) na Aruba. Mescos cu hopi otro lugar na mundo Aruba tambe a conose un epoca den cua hende ta pensa cu MA ta un fenómeno "normal" di personanan mayor di edad. Na Aruba e temponan ey tabata papia di "verkalk" of "kinds". Tabata pasa tambe cu ora un persona hoben tabata muestra síntomanan di MA cu esaki tabata ser mira como cu e persona ta "loco".

E diagnóstico di MA na e momentonan ey ainda tabata den su fasenan inicial.

E persona cu MA, cu tabata sali bai for di cas y perde, e tempo ey tabata hopi biaha e obheto di pestmento riba caya pa motibo di nan comportamiento. Incluso tabata pasa cu esakinan tabata ser explota financieramente y blanco di maltrato y abuso riba caya y frecuentemente tabata cana sushi, y si nan ta biba so, e vivienda tabata carese de higiene.

E persona cu MA cu ta wandro y perde, ademas di perdida di memoria tambe sa tin poco of ningun noción di tempo. Esaki ta un di e motibonan cu e persona aki no consiente si e a come of bebe awa caba y por deshidrata. Ya cu no tabata existi suficiente conocimiento di e malesa aki, e persona cu MA den su afan di wandro henter dia riba caya, den solo cayente sin tuma liquido y sushi tabata deshidrata. Tabatin hasta persona, cu a disparse y cu nunca mas a ser encontra of encontra morto (incluso encontra den un estado di descomposición varios luna despues di su desaparicion).

Den e caso cu e persona cu MA tabata tabata inquieto esakinan tabata (y te ainda) ta ser mara na cama of stul (tin biaha henter dia) of ta ser sera den un cuarto te ora e cuidado regresa cas).

Na final di anjanan 90's drs. Croes-Yáñez, a cuminsa organisa lecturanan y tayernan tocante diagnóstico di MA.

E tayernan aki a conose diferente oradornan entre otro: profesor dr. Harry van der Vlugt, neuropsicólogo (Universidad di Tilburg) y drs. Jaime Falconi, neurologo.

E obhetivo di e lecturanan aki tabata un preparacion pa cuminsa e proceso di consienticacion den comunidad pa cu MA y e situacionan cu e malesa aki por causa riba tereno di cuidado.

Na anja 2000, durante e preparación di un proyecto, pa bini cu Fundación Alzheimer Aruba, drs. Croes-Yáñez a cuminsa intensifica e frecuencia di e lecturanan y a organisa diferente tayernan na diferente gruponan den comunidad (medico, profesionalnan riba diferente tereno, cas di cuidado, empresanan, etc..

Su experiencia di e situacion e tempo ey a duna realse pa drs. Croes-Yáñez cuminsa cu un encuesta na 2001 y asina averigua di cuanto persona ta trata aki na Aruba cu na e momento ey tabata muestra e síntomanan di MA.

E evaluacion aki a ensera na prome luga un evaluacion di e cifras di Censo 2000 y 1991. (Mira figura 1.).




Figura 1: Grafico, Distribucion y Crecimiento (linia geel) di e poblacion di Aruba na edad. Fuente: Censo 1991 y 2000 (CBS).

E conclusion di e evaluacion aki a ensera cu durante e 9 anjanan a registra un aumento di e poblacion di e personanan di 60 anja y ariba. Pues un aumento di 6500 persona durante e conteo na inicio y cu a culmina te cu alrededor di 10.000 persona na anja 2000. Esaki ta ensera un aumento di mas cu 60% bou e poblacion di e personanan di 60 anja y ariba.

E poblacion den e edadnan entre 30 y 50 anja inicialmente tabata consisti di más cu 1 / 3 parti di e poblacion di Aruba. Den 9 anja e ultimo grupo aki (30 y 50 anja) a aumenta di 22.000 persona te cu mas di 33.000 personas; pues un aumento di mas cu 50%.

Si nos sali for di e punta di bista cu den e periodo di 9 anja e poblacion di personanan di 60 anja y mas tabata consisti di 10.000 persona y nos mantene e 15% cu ta ser usa na nivel mundial di e poblacion relaciona cu MA, esaki a hiba nos na un estimacion di alrededor di 1.500 persona na Aruba cu e tempo ey caba tabata den un of mas etapa di MA (incluso e personanan den e fase inicial di e síndrome di MA).

Como cu e sistema di diagnostico di MA ainda tabata den su pleno inicio, y e sintomanan tabata ser descarta como algo normal di envehecemento e resultadonan di e encuesta di anja 2001 por a papia solamente di 135 persona di

60 anja y más cu MA. Mester anadi aki cu e 135 casonan aki tabata trata di personanan cu ya tabata den e etapanan mas avansa di e malesa.

Na anja 2001 tabata conosi caba pa científiconan riba e tereno di MA, cu den e proximo anjanan dilanti porta, e cantidad di persona cu MA lo sigui aumenta mundialmente si no bini cu un cura. E pronostico pa anja 2050 den e caso aki ta cu e cantidad di e personanan cu MA lo triplica.

E resultadonan a base di e Censo 1991 y 2000 a muestra un crecimiento importante den e categoría di e edadnan entre 30 y 50 anja na Aruba. Nos por sali di e punta di bista cu na 2030 lo bai tin un aumento substancial di e poblacion di personanan di 60 anja y más.

E conclusion a base di e resultadonan por implica cu MA lo forma un problema grave y cu e cantidad di persona cu e malesa aki lo aumenta tambe na Aruba.

E informacion aki ta exige atencion urgente riba terenonan socio-economico, psicologico y juridico en cuanto e personanan cu MA y nan cuidador (nan) "(Fuente: resultado di encuesta di investigación; Drs Melva Croes-Yáñez, 2001).

A base di e resultadonan ya menciona drs.Croes-Yáñez a organisa e prome "Siman di Sinta Teal" na 2002. Un evento cu ta tuma luga anualmente den e siman rondo di 21 di september cual ta e dia internacional di Alzheimer.

Na februari 2003, "Fundacion Alzheimer Aruba (FAA) a ser oficialmente estableci.

En cuanto di e resultado di e esfuerzonan pa logra e meta di conscientisacion den comunidad riba e tereno di MA, por bisa cu esaki ta exitoso. Exitoso di tal forma cu:

Gran parti di Aruba awendia ta conosi cu y ta usa e terminologia Alzheimer den su contexto como un malesa.

Esaki ta un malesa cu tin su implicacion riba e cerebro y su funcionamiento.

Awendia hopi hende ta na altura cu MA no ta un proceso normal y di envehecemento.

Na anja 2006, e prome 2 edicionan di e boletín "FAA-INFO" a ser lansa cu un circulacion di 1.500 ehemplar. "FAA-INFO" a ricibi hopi bon acogida den comunidad na Aruba. Ta di lamenta cu pa falta di voluntario e proyecto aki a ser poni "on hold" en espera di voluntario.

Na 2008, 'F.A.A.' a inisia un trayecto cu ta ensera e plan di accion riba e tereno di conscientisacion pa cu e balor di e trabou voluntario, ya cu mester bisa cu e motivacion pa trabou comunitario na Aruba ta laga hopi di desea.

Pa duna nos vision realse nos mision pa e próximo 2 anjanan ta ensera pa bini cu un red di boluntarionan pa asina logra realisa e diferente proyectonan.

Nos lema pa e proximo anjanan ta:

*"Vision without mission is a daydream. Mision without vision is a nightmare.*